

摘藻堂四庫全書薈要

史部

欽定四庫全書薈要卷六千五百七十六史部

元史卷一百九十七

明翰林學士亞中大夫知制誥兼修國史宋濂等修

列傳第八十四

孝友

世言先王沒民無善俗元有天下其教化未必古若也而民以孝義聞者蓋不乏焉豈非天理民彝之存於人心者終不可泯歟上之人苟能因其所不泯者復加勸

獎而興起之則三代之治亦可以漸復矣今觀史氏之

所載其事親篤孝者則有臨江劉良臣汴梁陳善同官

強安瀋州高守質安豐高澤鞏昌王欽修武員思忠榆

縣王士寧河南朱友諒泉州葉森寧陵呂德汲縣劉淇

建昌鄭佛生堂邑張復亨保定邢政寧夏趙諾海臨潼

任居敬隴西周慶徐德興汝寧李從善華州要敬色目

氏實迪其居喪廬墓者則有太原王構萊州任梓平灤

王振北京張洪範登封王佐下蔡許從政張鏞富平王

賈僧鄭州段好仁趙壁薛明善張齊汴梁韓榮劉斌張
裕何泰史恪高成鄧孝祖李文淵杜天麟張顯祖涇陽
張國祥延安王旻東昌張暈永平梁訥高唐鄭榮劉居
敬同州趙良南陽周郁陳介劉權大同高著江都毛翔
歸德葛祥張德成張遜王珪劉弼汲縣徐昌祖真定宋
貞王世賢晉寧史貴保定耿德溫張行一賈秉實張昉
河南王宗道孫裔瓜爾佳天祐趙州趙德隆安豐王德
新石思讓翼寧河溥大都王麟李簡華陰李寧屈秀懷

慶侯榮丁用郭天一耀州王思中年閭讓曹州鄧淵呂
政徐州胡居仁張允中衛輝王慶福建朱虞龍隨州高
可燾濟寧魏鐸武康王子中淮安翟謨汶上趙恒須城
許時中衡山歐陽誠復江陵穆堅薊州王欽定陶元顯
祖絳州姚好智宿州孫克忠集慶傅霖濟南宋懷忠牟
克孝汝寧張郁泉州黃道賢谷城王福解州靖與曾般
陽戴貞兗州王治沔陽徐勝祖興中舒穆魯昌齡峽州
秦桂華蒙古色目氏納喇丹齊蘇默格濟阿哈瑪特拜

珠茂巴爾伊嚕音特穆爾索珠唐古特音扎噶李多羅
岱塔塔森岱爾其累世同居者則有休寧朱震雷池州
方時發河南李福真定杜良華州王顯政建寧王貴甫
旬容王榮周成鄆陵夏全保定成珪開平溫義大同王
瑞之平江湯文英鄜州員從政江州范士奇涇州李子
才宿州王珍其散財周急者則有河南高顏和台州程
遠大潭州湯居恭李孔英建康湯大有吉州劉如翁嚴
用父高唐孟恭松江管仲德章夢賢夏椿江陵陳一寧

中興傳文鼎永州唐必榮濟南李恭寧夏何惠月天子
皆嘗表其門閭或復其家故援唐史之例具列姓名於
篇端擇其事蹟尤彰著者復別為之傳云

王閏東平須城人父素多貲既老盡廢之不甘淡薄每
食必需魚肉閏朝夕勤苦入市營奉無闕父性復乖戾
閏左右承順甚得其歡心鄉里稱焉父嘗臥疾夜燃長
明燈室中火延籬壁間閏聞火聲驚起馳救火已熾烟
燄蔽寢戶閏突入火中解衣蒙父抱而出肌體灼爛而

父無少傷一女不能救遂焚死中統二年復其役

郭道卿興化莆田人四世祖義重至孝宋紹興間有詔
旌之鄉里為立孝子祠至元初內附閩盜起居人竄匿
道卿與弟佐卿獨守孝子祠不忍去遂俱被執盜將殺
佐卿道卿泣告曰吾有兒已長弟弱子幼請代弟死佐
卿亦泣告曰吾家事賴兄以理請殺我道卿固引頸請
刃盜相顧曰汝孝門兄弟若此吾何忍害兩釋之道卿
年八十子廷焯為建寧路平準行用庫使辭歸侍養道

卿嘗病疝危甚廷焯憂瘁扶護一夕髮盡白有司言狀旌之

蕭道壽京兆興平人家貧鬻鍼以自給母年八十餘道壽事養盡禮每旦俟母起夫婦親侍盥櫛日三飯必待母食然後退就食至夕必待母寢然後退就寢出外必以告母許乃敢出母或怒欲罰之道壽自進杖伏地以受杖足母命起乃起起復再拜謝違教拱立左右俟色喜乃退母嘗有疾醫累歲不能療道壽剗股肉啖之而

愈至元八年賜羊酒表其門

郭狗狗平陽翼城人父寧為欽察先鋒使首領官戍大良平宋將史太尉來攻夜陷大良寧全家被俘史將殺寧狗狗年五歲告史曰勿殺我父當殺我史驚問寧曰是兒幾歲耶寧曰五歲史曰五歲兒能為是言吾當全汝家即以騎送寧等往合州道遇國兵騎驚散寧家俱得還御史以事聞命旌之

張閏延安延長縣人隸軍籍八世不異爨家人百餘口

無間言日使諸女諸婦各聚一室為女紅工畢斂貯一庫室無私藏幼稚啼泣諸母見者即抱哺一婦歸寧留其子衆婦共乳不問孰為己兒兒亦不知孰為己母也閨兄顯卒即以家事付姪聚聚辭曰叔父行也叔宜主之閨曰姪宗子也姪宜主之相讓既久卒以付聚搢紳之家自謂不如至元二十八年旌表其門又有蕪湖芮世通十世同居峽州向存義汴梁丁煦八世同居州縣請於朝並加旌美

田改住汶上人父病不能愈禱於天去衣臥冰上一月
同縣王住兒母病臥冰上半月

甯珠赫山丹州人母年七十餘患風疾藥餌不效珠赫
割股肉進啖遂愈歲餘復作不能行珠赫手滌溷穢護
視甚周造板輿載母夫婦共舁行園田以娛之後卒居
喪有禮鄉閭稱焉潭州萬戶伊喇瓊子李嘉努九歲母
病醫言不可治李嘉努割股肉煮糜以進病乃痊撫州
路總管管如林渾州民朱天祥並以母疾割股旌其家

布延蘇達勒默呼氏家秦州父喪廬墓次晝夜悲號有
飛鳥翔集墳土踊起又有尹夢龍中興人母喪負土為
墳結廬居其側手書孝經千餘卷散鄉人讀之有羣鳥
集其冢樹

樊淵建康句容人幼失父事母篤孝至元十二年奉母
避兵茅山兵至欲殺其母淵抱母號哭以身代死兵兩
釋之三十年江東廉訪使者辟為吏母亡奔喪哀感行
路服闋奉神主事之起居飲食十年如平生臺憲交薦

淵不忍去墳墓終不起延祐間汀州寧化人賴祿孫母病值蔡五九作亂負母從邑人避南山盜至衆散走祿孫守母不去盜將刃其母祿孫以身翼蔽曰勿傷吾母寧殺我母渴不得水祿孫含唾煦之盜相顧駭歎不忍害反取水與之有掠其妻去者衆責之曰奈何辱孝子婦使歸之事聞並賜褒表

劉德泉汴梁杞縣人早喪母父榮再娶王氏生二子居敬居元俱幼德泉甚撫之及王氏病卒乃益相友愛至

元末歲饑父欲使析居德泉泣止不能得乃各受其業以去久之父卒兄弟相約同爨和好如初至治三年真定朱顯自至元間其祖父已分財至顯念姪彥昉等年幼無恃謂弟耀曰父子兄弟本同一氣可異處乎乃會拜祖墓下取分券焚之復與同居延祐間蔚州吳思達兄弟六人嘗以父命析居思達為開平縣主簿父卒還家治葬畢會宗族泣告其母曰吾兄弟別處十餘年矣今多破產以一母所生忍使兄弟苦樂不均耶即以家

財代償其逋更復共居母卒哀毀甚宅後柳連理人以
為友義所感又有朱汝諧濮州人父子明嘗命與兄汝
弼別產子明卒汝弼家盡廢汝諧泣請共居仲父子昭
子玉貧病汝諧迎至家奉湯藥甘旨甚謹後卒喪葬盡
禮鄉人賢之州縣各以名聞表其閭

郭回邵武人素貧年六十無妻奉母寄宿神祠中營養
甚艱母年九十八卒回傭身得錢葬之每旦詣墳哭祭
十四年不輟州上狀命給衣糧贍濟仍表異之

孔全亳州鹿邑人父成病刲股肉啖之愈後卒居喪盡

哀廬墓左負土為墳日六十肩風雨有虧俟霽則補之

三年則墳廣一畝高三丈餘張子夔安西人父喪每夜

半以背負土肘膝行地匍匐至葬所篩細土為墳陳乞

兒歸德夏邑人年九歲母喪哀毀親負土為墳高一丈

廣十六步人憫其幼欲助之則泣拜而辭又有峨眉趙

國安解州張琛南陽李庭瑞息州伊喇巴延南陽齊哩

克儺皆居喪有至行廬墓負土為墳並以有司所請表

異之

楊一懷孟人至元間憐其叔清家貧密以分契詣神祠
焚之與清同居者三十年無間言張本東昌荏平入篤
孝事伯父叔父皆甚謹伯父嘗病本晝夜不去側復載
以巾車步挽詣岱嶽禱之張慶真定人善事繼母伯父
泰異居河南慶聞其貧迎歸養之供饌豐備過於所生
元善大名入父有昆弟五人因貧流散江淮久之遂客
死至大四年善往尋其骸骨并迎其弟姪等十五喪而

歸改葬祖父母以諸喪序列祔於塋次州縣以聞並旌其家

趙毓唐州人父福遷鄭之管城其先三世同爨毓官福州司獄滿歸以母老不復任一曰會諸弟泣申遺訓願世世無異處且祝天歆血以盟自是大小百口畧無間言同力合作家道以殷毓長兄瑞早世嫂劉氏守志毓率家人事之甚恭次兄選繼歿嫂王氏毓母以其少許歸改嫁王氏曰婦無再嫁之義願終事姑毓妹贅王佑

佑亡妹念佑母無子乞歸朱氏養之人謂孝友節義萃
毓一家元貞初旌之

胡光遠太平人母喪廬墓一夕夢母欲食魚晨起號天
將求魚以祭見生魚五尾列墓前俱有啣痕鄰里驚異
方共聚觀有獺出草中浮水去衆知是獺所獻以狀聞
於官表其閭至順間永平龐遵母病腫三年不能起忽
思食魚遵求於市不得歸途嘆恨忽有鯉躍入其舟作
羹以獻母悅病瘥

陳韶孫廣州番禺人父瀏以罪流肇州韶孫年十歲不
忍父遠謫朝夕號泣願從父不能奪遂與俱往跋涉萬
里不憚勞苦道過遼陽平章達春見而憫焉語之曰天
子寬仁罰不及嗣邊地苦寒非汝所堪吾返汝故鄉汝
願之乎韶孫曰既不能以身代父當死生以之歸非所
願也達春驚異以錢賞之大德六年瀏死韶孫哀慟見
者皆為之泣下肇州萬戶府以聞命遣還鄉里仍旌異
之

李忠晉寧人幼孤事母至孝大德七年地大震郇保山
移所過居民廬舍皆摧壓傾圮將近忠家分為二行五
十餘步復合忠家獨完吳國寶雷州人性孝友父喪廬
墓大德八年境內蝗害稼惟國寶田無損人皆以為孝
感所致云

李茂大名人徙家揚州父興壽臨卒語茂曰吾病且死
爾善事母茂泣受命奉母孟氏益謹母嘗病目失明茂
禱於泰安山三年復明又願母壽每夕祝天乞損己年

孟母孟氏竟年八十四而歿居喪哀慟聞者傷之大德九年揚州再火延燒千餘家火及茂廬皆風返而滅事聞旌之

羊仁廬州廬江人至元初阿珠兵南下仁家為所掠父被殺母及兄弟皆散去仁年七歲賣為汴人李子安家奴力作二十餘年子安憐之縱為良仁蹤蹟得母於潁州蒙古軍塔海家兄於睢州蒙古軍約尼家弟於邯鄲連大家皆為役尚無恙乃徧懇親故貸得鈔百錠歷詣

諸家求贖之經營百計更六年乃得遂大小二十餘口
復聚居為良孝友甚篤鄉里美之大德十二年旌其家
又有黃覺經建昌人五歲因亂失母稍長誓天誦佛書
願求母所在乃渡江涉淮行乞而往衝冒風雪備歷艱
苦至汝州梁縣春店得其母以歸章卿孫蜀人本劉氏
幼為章提刑養子與母富氏相失三十八年遍訪於江
西諸郡迎歸養之俞全杭州人幼被掠賣為劉餒家奴
後獲為良自汴步歸杭尋其母及姊得之事母以孝聞

李鵬飛池州人生母姚氏為嫡母不容改嫁為朱氏妻
鵬飛幼不知也年十九思慕哀痛誓學醫以濟人願早

見母行求三歲至蘄州羅田縣得焉時朱氏家方疫鵬
飛起之遂迎還奉養久之復歸朱氏時渡江省覲既卒
歲時攜子孫往祭奠終其身並以有司所請旌其閭

趙一德龍興新建人至元十二年國兵南伐被俘至燕
為鄭留守家奴歷事三世號忠幹至大元年一日拜請
其主鄭阿爾斯蘭及其母澤國太夫人曰一德自去父

母得全生依門下者三十餘年矣故鄉萬里未獲歸省
雖思慕刻骨未嘗敢言今父母已老脫有不幸則永為
天地間罪人矣伏地涕泣不能起阿爾斯蘭母子皆感
動許之歸期一歲而返一德至家父兄已歿惟母在年
八十餘一德卜葬二柩畢欲少留事母懼得罪如期還
燕阿爾斯蘭母子嘆曰彼賤隸乃能是吾可不成其孝
乎即裂券縱為良一德將辭歸會阿爾斯蘭以冤被誅
詔籍其家羣奴各亡去一德獨奮曰主家有禍吾忍同

路人耶即留不去與張錦童詣中書訴枉狀得昭雪還其所籍太夫人勞一德曰當吏籍吾家時親戚不相顧汝獨冒險以白吾枉疾風勁草於汝見之令吾家業既喪而復存者皆汝力也吾何以報汝因分美田廬遺之一德謝曰一德雖鄙人非有利於是也重哀吾主無罪而受戮故留以報主今老母八十餘得歸侍養主之賜已厚矣何以田廬為遂不受而去皇慶元年旌其門王思聰延安塞人素力田農隙則教諸生得束脩以

養親母喪盡哀父繼娶楊氏事之如所生以家多幼稚
侵父食別築室曰養老堂奉之朝夕定省愈久不怠父
嘗病劇思聰憂甚拜祈於天額膝皆成瘡得神泉飲之
愈後復失明思聰舐之即能視縣上狀命表異之

徹辰台奎蘇氏幼喪父事母篤孝稍壯母歿慟哭頓絕
水漿不入口者三日既葬居喪有禮每節序祭祀哭泣
常如袒括時年四十餘思慕猶如孩童每見人父母則
嗚咽流涕人問其故曰人皆有父母我獨無是以泣耳

至大三年褒異

王初應漳州長泰人至大四年二月從父義士樵劉嶺山有虎出叢棘中搏義士傷右肩初應赴救抽鎌刀刺虎鼻殺之義士得生泰定二年同縣施合德父真祐嘗出耘為虎扼於田合德與從弟發仔持斧前殺虎父得生並旌其門

鄭文嗣婺州浦江人其家十世同居凡二百四十餘年一錢尺帛無敢私至大間表其門文嗣歿從弟大和繼

主家事益嚴而有恩家庭中凜如公府子弟稍有過頌
白者猶鞭之每遇歲時大和坐堂上羣從子皆盛衣冠
鴈行立左序下以次進拜跪奉觴上壽畢皆肅容拱手
自右趨出足武相銜無敢參差者見者嗟慕謂有三代
遺風狀聞復其家部使者余闕為書東浙第一家以褒
之大和方正不奉浮屠老子教冠婚喪葬必稽朱熹家
禮而行執親喪哀甚三年不御酒肉子孫從化皆孝謹
雖嘗仕宦不敢一毫有違家法諸婦唯事女工不使預

家政宗族里閭皆懷之以恩家畜兩馬一出則一為之不食人以為孝義所感有家範三卷傳於世

王薦福寧人性孝而好義父嘗疾甚薦夜禱於天願減已年益父壽父絕而復甦告其友曰適有神人黃衣紅帕首恍惚語我曰汝子孝上帝命錫汝十二齡疾遂愈後果十二年而卒母沈氏病渴語薦曰得瓜以啖我渴可止時冬月求於鄉不得行至深奧嶺值大雪薦避雪樹下思母病仰天而哭忽見巖石間青蔓離披有二瓜

焉因摘歸奉母母食之渴頓止兄孟幹早世嫂林氏更
適劉仲山仲山嘗以田鬻於薦及死不能葬且無子族
以其貧莫肯為之後薦即以田還之使置後且治葬焉
州禁民死不葬者時民貧未葬者衆畏令悉焚柩棄骨
野中薦哀之以地為義阡收瘞之有死不能斂者復買
棺以贈人皆感焉至大四年其鄉旱民艱糴薦盡出儲
粟賑之有施福等十一家饑欲死薦聞惻然欲濟之家
粟已竭即以已田易穀百石分給之福等德其活已每

月朔會佛祠為祈福福建宣慰司上狀旌之

郭全遼陽人幼喪母哀戚如成人及壯父庭玉又卒居廬三載啜粥面墨事繼母唐古氏甚孝唐古氏生四子皆幼全躬耕以養既長娶婦各求分財異居全不能止凡田廬器物悉自取朽敝者奉唐古氏以居甘旨無乏唐古氏卒全年六十餘哀痛毀瘠廬其墓終喪又有劉德奉元人父娶後妻何氏德事之如所生家貧傭工取直寸錢尺帛皆上之四弟並何出德撫愛尤篤年五十

未娶稱貸得錢先為弟求婦諸弟亦化其德一門藹然鄉里稱為劉佛子瑪雅噶伊嚕勒昆氏素貧事繼母張氏庶母呂氏克盡子職劉居敬大都人年十歲繼母郝氏病居敬憂之懇天以求代狀聞並褒表之

楊皞扶風人父清母牛氏牛氏嘗病劇皞叩天求代遂痊如是者再後牛氏失明皞登太白山取神泉洗之復如故牛氏歿哀毀特甚葬之日大雨獨皞墓前後數里密雲蔽之雨不沾土送者大悅葬畢令妻衛氏家居養

清皦獨廬墓上負土為墳疏食水飲終其喪清卒亦如之

丁文忠許州偃城人業鼓冶母和氏疾與弟文孝竭力調侍母卒文忠廬墓側不與妻面者三年父貴又疾醫不能療文忠造車一輛兄弟共御之載父禱於高山五臺泰安河瀆諸祠途遇異僧遺藥而愈延祐七年旌之邵敬祖宛邱人父喪廬墓母繼歿河決不克葬殯於城西敬祖露宿依其側風雨不去友人哀之為縛草舍庇

之前後居廬六年兩髀俱成濕疾至治三年旌其家其
後又有永平李彥忠父喪廬墓八年不至家茶陵譚景
星幼失父追念之廬其墓十年亳州郭成年七十一母
喪食粥廬墓一年朝夕哭臨人哀其老而能孝

扈鐸汴梁蘭陽人蚤孤育於伯父及壯事伯父如所生
伯父老無子鐸為買妾歲餘產一女其妾性頗不慧熟
寐壓女死久之伯父卒鐸喪之甚哀遺腹生一男鐸懲
前失告其母及妻妹護視之已復廬戶外中夜審察不

敢安寢弟能食常自抱哺與同臥起十年不少怠弟有疾鐸夜稽顙星斗哀禱曰天不伐余家鐸父子間可去一人勿喪吾弟使伯父無後也明旦弟愈母卒哀毀踰禮廬於墓側不理家事宗族勸之歸鐸曰今歲凶多盜吾家雖貧安知墓中無可欲乎倘驚吾親之靈雖生何為卒守廬不去

孫秀實大寧人性剛毅喜周人急里人王仲和嘗託秀實貸富人鈔二千錠貧不能償棄其親逃去數年其親

思之疾秀實日饋薪米存問終不樂秀實哀之悉為代償取券還其親復命奴控馬賣金訪仲和使歸父子歡聚聞者莫不嘆美又李懷玉等貸秀實鈔一千五百錠度無以償盡還其券不徵復有賈進大同人大德九年地震民居多傷且乏食進給酒藥炭米濟之每歲冬製木棉裘數百襲衣寒者買地為義阡使無墓者葬之李子敬陝西三原人嫁不能嫁者五十餘人葬不能葬者五十餘喪焚逋券四萬餘貫有司以名聞並旌之

宋杞大都人年十九父內宰卒擗踊號泣絕而復甦水漿不入口者三日哀氣傷心遂成疾伏臥牀榻猶哭不止淚盡繼之以血既葬疾轉甚杞有繼母無他兄弟度不能自起作遺書囑其妻楊氏曰汝善守志以事吾母遂卒楊氏遺腹生一男人以為孝感天不絕其嗣云泰定三年旌其門

趙榮扶風人母強氏有疾榮割股肉啖之者三復負母登太白山禱於神得聖水飲之乃痊後年七十五卒榮

號痛不食三日方飲水七日乃食粥葬之日白雲庇其墓前後十五里葬畢而散榮負土成墳廬其側終喪

吳好直華州蒲城人父歿事繼母孝兄弟嘗求分財好直勸諭不能止即以己所當得悉推與之出從師學澹泊三十年無少悔又有甄城柴郁陳舜咨皆能孝友以己產分讓兄弟縣令言狀並表美之

余丙建德遂安人幼喪母泣血成疾父亡不忍葬結廬古山下殯其中日閉戶守視有牧童遺火延殯廬丙與

子慈亟撲不止欲投身火中與柩俱焚俄暴雨火滅
徐鈺鎮江人始冠侍父鎮將之婺源過丹陽小谿鎮乘
橋失足墮水中同行者立岸上不能救鈺投谿擁鎮出
鎮得挽行舟以升鈺力憊且水勢湍急遂溺死屍流四
十五里得於灘江浙行省言狀表異之

尹莘汴梁洧川人至治初遊學於京師忽夢母疾心怪
之馳歸母已亡居廬蔬食哀毀骨立每雞鳴而起手治
祭饌詣墓所哭奠之風雪不廢父輔臣嘗病疫莘侍奉

湯藥衣不解帶嘗其糞以驗差劇夜則禱於天曰羊母
亡不能見父病不能治為人子若此何以自立於世願
死以代父命數日愈鄉里嗟異之又有高唐孫希賢母
病痢希賢閱方書有曰血溫身熱者死血冷身涼者生
希賢嘗之其血溫乃號泣祈天求身代之母遂愈高郵
卜勝榮母痢不能藥日嘗痢以求愈兄疾禮北辰乞減
己年延之並痊

劉廷讓大寧武平人至順初北方兵起民被殺掠廷讓

挈家避山中有幼弟方乳母王氏置於懷兵急廷讓乃
棄己子一手抱幼弟一手扶母疾驅得免事聞旌之

劉通亳州譙縣人家貧業農母卜氏好聲樂每眩技者
以簫鼓至門必令娛侍或自歌舞以悅母心卜氏目失
明通誓斷酒肉禱之三十年不懈卜氏年八十五忽復
明至大間鄱陽黃鑑皇慶間諸暨丁祥一皆以親喪明
以舌舐之復能視並命褒表

張旺舅安豐霍邱人幼失父母陳氏居貧守志旺舅九

歲賣錫以養及長母病伏枕數月旺舅無貲命醫惟日夜痛哭禮天求代未幾遂愈又自以生業微不能多給竟不娶以終母年縣令言於朝旌之

張思孝華州人母喪以孝聞父疾調護甚至不愈以父涕漬半器垂泣盡飲之復潔齋致禱乞以身代未幾遂痊至順三年表其門

杜佑邳州人河南行省署為三义水馬站提領父成病於家佑忽心驚舉體沾汗即棄職歸父病始二日遂禱

神求代且嘗糞以驗疾父卒廬墓盡哀有馴兔之瑞

長壽父帖珠官平章政事生五子長山壽早世次即長
壽次永壽福壽孟古哈雅元統間帖珠歿長壽哀毀盡
禮服闋當蔭敘與弟羅拜母前曰吾父廉貧諸弟未有
所立願以職讓永壽永壽讓福壽福壽曰二兄能讓福
壽獨不能耶以讓孟古哈雅母從之孟古哈雅遂告蔭
為太禧宗禋院神御殿侍禮佐郎階奉議大夫兄弟奉
母尤篤邦閭美之至大間河中梁威遜親喪廬墓兄諾

海為鄂囉官自以嘗遠仕不得養其親即棄職舉威遜
代之人稱威遜能孝諾海能義又有輝和爾氏齊齊克
及濠州高中嘉定武進皆以侍親不願仕以祖父蔭讓
叔父昆弟云

孫瑾鎮江丹徒人父喪哀毀嚴冬跣足而步停柩四載
衣不解帶常食粥誦佛書及葬載柩渡江潮波方湧俄
順風翼帆如履平地事繼母唐氏尤孝嘗患癰瑾親吮
之又喪目瑾舐之復明唐氏卒卜日將葬時春苦雨瑾

夜號天乞霽至旦雲日開朗甫掩壙陰氣復合雨注數日不止又有吳希曾睢寧人父卒葬之日大雨希曾跪柩前炷艾燃腕火熾雨止既葬廬其墓左縣上狀並旌之

張恭河南偃師人以兵部符署鷹房府案牘親老辭歸侍養懇理先墓身負水灌松柏父喪過哀侍母馮氏尤謹歲凶恭夫婦采野菜為食而營奉甘旨無乏母有疾恭手除溷穢喂哺飲食且嘗糞以驗疾勢天歷初西兵

至河南居民悉竄恭守視母病項中一劍不去母驚悸而歿恭居喪盡禮人稱孝焉有詔旌其閭

訾汝道德州齊河人父興卒居喪以孝聞母高氏治家嚴汝道承順甚恭母嘗寢疾晝夜不去側一日母屏人授以金珠若干曰汝素孝室無私蓄我一旦不諱此物非汝有矣可善藏之母令他兄弟知也汝道泣拜曰吾父母起艱難成家業今田宅牛羊已多汝道恨無以報大恩尚敢受此以重不孝之罪乎竟辭之母卒哀毀終

喪不御酒肉性尤友愛二弟將析居汝道悉以美田廬讓之二弟早世撫諸孤如己子鄉人劉顯等貧無以為生汝道割己田畧之使食其租終身里中嘗大疫有食瓜得汗而愈者汝道即多市瓜及攜米厯戶饋之或曰癘氣能染人勿入也不聽益周行問所苦然卒無恙有死者復贈以槨櫨人咸感之嘗出麥粟餼人至秋蝗食稼人無以償汝道聚其券焚之縣令李讓為請旌其家

こころいふこと

元史

三十五

元史卷一百九十七

元史卷一百九十七考證

南陽陳介淮安翟謨 續通考作陳仁穆謨

王閔傳中統二年復其役 永樂大典載復役在中統

三年

甯珠赫傳珠赫李嘉努管如林朱天祥並以母疾刲股
旌其家 按元典章至元七年御史臺以新城杜添
兒割股奉母請旌省議以毀傷親體不行珠赫等予
旌當在七年以前事

尹莘傳 按莘一統志作萃續通鑑作華

欽定四庫全書蒼要卷六千五百七十七 史部

元史卷一百九十八

明翰林學士亞中大夫知制誥兼修國史宋濂等修

列傳第八十五

孝友二

王庸字伯常雄州歸信人事母李氏以孝聞母有疾庸
夜禱北辰至叩頭出血母疾遂愈及母卒哀毀幾絕露
處墓前旦夕悲號一夕雷雨暴至鄰人持寢席往欲蔽

之見庸所坐臥之地獨不霑濕咸嘆異而去復有蜜蜂數十房來止其家歲得蜜蠟以供祭祀

黃贊字止敬臨江人父君道延祐間求官京師留贊江南時贊年幼及既長聞其父娶後妻居永平乃往省之則父歿已三年矣庶母聞其來盡挾其貲去更嫁拒不見贊贊號哭語人曰吾之來為省吾父也今不幸吾父已歿思奉其柩歸而窆之莫知其墓苟得見庶母示以葬所死不恨矣尚忍利遺財邪久之聞庶母居海濱亟

裹糧往庶母復拒之三日不納庶母之弟憐之與偕至永平屬縣樂亭求父墓又弗得贊哭禱於神一夕夢老父以杖指葬處曰見片磚即可得明日就其地求之庶母之弟曰真是已斂時有某物可驗啓朽棺得父骨以歸

石明三者與母居餘姚山中一日明三自外歸覓母不見見壁穿而臥內有三虎子知母為虎所害乃盡殺虎子礪巨斧立壁側伺母虎至斫其腦裂而死復往倚巖

石傍執斧伺候斫殺牡虎明三亦立死不仆張目如生
所執斧牢不可拔

劉琦岳州臨湘人生二歲而母劉氏遭亂陷於兵琦獨
事其父稍長思其母不置常歎曰人皆有母而我獨無
輒歔欷泣下及冠請於父往求其母遍歷河之南北淮
之東西數歲不得後求得於池州之貴池迎以歸養其
後十五年而父歿又三年而母歿終喪猶蔬食有司上
其事旌表其門曰孝義

劉源歸德中牟人母吳氏年七十餘病甚不能行適兵
火起且延其家隣里俱逃走源力不能救乃呼天號泣
趨入抱母為火所焚而死

祝公榮字大昌處州麗水人隱居養親事母甚孝母歿
居喪盡禮竈突失火公榮力不能救乃伏棺悲哭其火
自滅鄉里異之塑二親像於堂朝夕事之如事生焉

陸思孝紹興山陰樵者性至孝母老病痢思孝醫禱久
之不效思孝方欲剗股肉為糜以進忽夢寐間恍若有

神人者授以藥劑思孝得而異之即以奉母其疾遂愈
姜兼嚴州淳安人七歲而孤與二兄養母至孝母死兼
哀慕幾絕既葬獨居墓下朝夕哭奠寂焉荒山中躬自
樵爨疏食飲水一衰麻寒暑不易同里陳氏戴氏子不
能事其父母聞兼之行慙感而悔皆迎養焉

胡伴侶鈞州密縣人其父實嘗患心疾數月幾死更數
醫俱莫能療伴侶乃齋沐焚香泣告於天以所佩小刀
於右脇傍剗其皮膚割脂一片煎藥以進父疾遂瘳其

傷亦旋愈朝廷旌表其門

王士弘延安中部人父搏有疾士弘傾家貲求醫見醫
即拜遍禱諸神叩額成瘡父歿哀毀盡禮廬墓三年足
未嘗至家墓廬上有奇鵲來巢飛鳥翔集與士弘親近
若相狎然衆咸異之終喪復建祠於塋前朔望必往奠
祭雖風雨不廢也有司上其事於朝旌表之

何從義延安洛川人祖良祖母李氏偕亡從義廬於墓
側旦夕哀慕不脫經帶不食菜果惟啖蔬食而已事父

世榮母王氏孝養尤至伯祖温伯祖母郝氏叔祖恭叔
祖母賀氏叔祖讓叔祖母姜氏叔父珍叔母光氏皆無
子比其亡也從義咸為治葬築高墳祭奠以禮時人義
之

阿都齊大都固安州人天性篤孝幼孤養母母嘗有疾
醫治不痊阿都齊礪其所佩小刀拜天泣曰慈母生我
劬勞今當捐身報之乃割開左脇取肉一片作羹進母
母曰此何肉也其甘如是數日而病愈

高必達建昌人五歲時父明大忽棄家遠遊莫知所適
必達既長晝夜哀慕乃娶妻以養母而歷往四方求其
父十餘年不得見心愈悲忽相傳黃州全真道院中有
虛明子者學道三十年矣本姓高氏建昌人也匿姓名
為道人云必達詢問知為父即往拜之具言家世及已
之所生歲月大父母之喪葬始末因哀號叩頭不已虛
明猶瞑坐不顧久之斥曰我非汝父不去何為必達留
侍左右不少懈辭色哀惻可矜其徒謂虛明日師有子

如此忍弗歸乎虛明不得已乃還家必達孝養篤至鄉里稱之

曾德漁陽人宗聖公五十七代孫母早亡父仲祥再娶左氏仲祥遊襄陽樂其土俗因攜左氏家焉亂兵陷襄陽遂失左氏德徧往南土求之五年乃得於廣海間奉迎以歸孝養甚至有司以聞詔旌復其家

靳曷字克昌絳州曲沃人兄榮為奎章閣承制學士奉母王氏官於朝母歿曷與兄榮護喪還家至平定大雷

雨流水驟至曷伏柩上榮呼之避水曷不忍舍去遂為
水所漂沒後得王氏柩於三里外得曷屍於五里外詔
賜孝子靳曷碑

黃道賢泉州人嫡母唐無子道賢在襁褓而生母蘇以
疾去既長思念生母屢請於父得召之歸道賢竭力養
二母得其歡心父病篤道賢晝夜奉湯藥不離膝下遍
求良醫莫效乃夜禱於天願減己一紀之算以益父壽
其父遂愈至元統二年乃歿果符一紀之數道賢居喪

盡禮負土築墳廬於墓側疏食終制至元二年有司上其事旌其門曰孝子黃氏之門

史彥斌邳州人嗜學有孝行至正十四年河溢金鄉魚臺墳墓多壞彥斌母卒慮有後患乃為厚棺刻銘曰邳州沙河店史彥斌母柩仍以四鐵環釘其上然後葬明年墓果為水所漂彥斌縛草為人置水中仰天呼曰母棺被水不知其處願天矜憐哀子之心假此芻靈指示母棺言訖涕泣橫流乃乘舟隨草人所之經十餘日行

三百餘里草人止桑林中視之母柩在焉載歸復葬之
張紹祖字子讓潁州人讀書力學以孝行聞於朝特授
河南路儒學教授至正十五年奉父避兵山間賊至執
其父將殺之紹祖泣曰吾父耆德善人不當害請殺我
以代父死且若等非父母所生乎何忍害人父也賊怒
以戈擊之戈應手挫鈍因感而相謂曰此真孝子不可
害乃釋之

李明德瑞州路上高縣人讀書有志操孝行篤至至正

十四年亂兵陷袁州因抄掠上高兵執其父欲殺之明德泣曰子豈不能代父乎願勿害吾父也兵遂殺明德而免其父後以高壽終

張緝字士明益都膠州人性孝友能詩文至正七年與兄紳弟經同領鄉薦由澤州儒學正轉泰州幕職棄之養親居揚州十五年揚州亂緝母姬氏方臥病賊突入臥內舉槍欲刺姬緝以身蔽姬槍中緝脇三日而死

魏敬益字士友雄州容城人性至孝居母喪哀毀骨立

素好施與有男女失時者出資財為之嫁娶歲凶老弱
之饑者為糜以食之敬益有田僅十六頃一日語其子
曰自吾買四莊村之田十頃環其村之民皆不能自給
吾深憫焉今將以田歸其人汝謹守餘田可無餒也乃
呼四莊村民諭之曰吾買若等業使若等貧不聊生有
親無以養吾之不仁甚矣請以田歸若等衆聞皆愕眙
不敢受強與之乃受而言諸有司有司以聞於中書請
加旌表丞相賀太平歎曰世乃有斯人哉

湯霖字伯雨龍興新建人早喪父事母至孝母嘗病熱更數醫弗能效母不肯飲藥曰惟得冰我疾乃可愈爾時天氣甚燥霖求冰不得累日號哭於池上忽聞池中戛戛有聲拭淚視之乃冰澌也亟取以奉母其疾果愈孫抑字希武世居晉寧洪洞縣抑登進士第歷仕至刑部郎中闔保之變挈父母妻子避兵平陽之柏村有亂兵至村剽掠拔白刃嚇抑母求財不得舉刃欲斫之抑亟以身蔽母請代受斫乃得釋而抑父被虜去遂不知

所之或語之曰汝父被驅而東矣然東軍得所掠民皆殺之汝慎無往就死也抑曰吾可畏死而棄其父乎遂往出入死地屢瀕危殆卒得父以歸

石永紹興新昌人性淳厚事親至孝值亂兵掠鄉里永父謙孫年八十老不能行永負父匿山谷中亂兵執其父欲殺之永亟前抱父請以身代兵遂殺永而釋其父王克己延安中部人父伯通歿克己負土築墳廬於墓側摩該縱兵暴掠縣民皆逃竄克己獨守墓不去家人

呼之避兵克己曰吾誓守墓三年以報吾親雖死不可棄也遂不去俄而兵至見其身衣衰形容憔悴曰此孝子也遂不忍害竟終喪而歸

劉思敬延安宜君人事其繼母沙氏杜氏孝養之至無異親母父年八十兩目俱喪明會亂兵剽掠其鄉思敬負父避於巖穴中有兵至欲殺思敬思敬泣言曰我父老矣又無目我死不足惜使我父何依乎兵憐其孝不忍殺父子皆免於難

呂祐字伯通晉安人至正二十六年郡城破有卒入其室拔白刃脅其母林氏索財寶不得揮刃欲斫母祐急以身蔽母而奪其刃手指盡裂被傷仆地良久而甦開目視母曰母幸無恙我死無憾矣遂瞑目死

周樂溫州瑞安人宋狀元坦之後父日成通經能文海賊竊據溫州拘日成置海舟上樂隨往事其父甚謹一日賊酋遣人沈日成於水樂泣請曰我有祖母幸留父侍養請以己代死賊不聽樂抱父不忍捨遂同死焉

元史卷一百九十八

元史卷一百九十八考證

石永紹興新昌人 萬姓統譜作石永壽按地理志紹興瑞州所屬並有新昌元史類編以永為瑞州新昌人





總校官編修臣吳紹深

欽定四庫全書薈要

史部
元史卷一百九十九
至二百一

詳校官編修臣王天祿



欽定四庫全書蒼要卷六千五百七十八史部

元史卷一百九十九

明翰林學士亞中大夫知制誥兼修國史宋濂等修

列傳第八十六

隱逸

古之君子負經世之術度時不可為故高蹈以全其志
使得其時未嘗不欲仕仕而行所學及物之功豈少哉
後世之士其所蘊蓄或未至而好以跡為高當邦有道

之時且遁世離羣謂之隱士世主亦苟取其名而強起之及考其實不如所聞則曰是欺世釣譽者也上下豈不兩失也哉元之隱士亦多矣如杜瑛遺執政書暨張特立居官之政則非徒隱者也蓋其得時則行可隱而隱頗有古君子之風而世主亦不強之使起可謂兩得也已自是以隱逸稱者蓋往往而有今撫其可傳者作
隱逸傳

杜瑛字文玉其先霸州信安人父時昇金史有傳瑛長

七尺美鬚髯氣貌魁偉金將亡士猶以文辭規進取瑛獨避地河南緱氏山中時兵後文物凋喪瑛搜訪諸書盡讀之讀輒不忘而究其指趨古今得失如指諸掌間闕轉徙教授汾晉間中書鈕祜祿珪開府於相瑛赴其聘遂家焉與良田千畝辭不受術者言其所居下有藏金家人欲發視輒止之後來居者果得黃金百斤其不苟取如此歲己未世祖南伐至相召見問計瑛從容對曰漢唐以還人君所恃以為國者法與兵食三事而已

國無法不立人無食不生亂無兵不守今宋皆蔑之殆
亡矣興之在聖主若控襄樊之師委戈下流以擣其
背大業可定矣帝悅曰儒者中乃有此人乎瑛復勸帝
數事以謂事不如此後當如彼帝納之心賢瑛謂可大
用命從行以疾弗果中統初詔徵瑛時王文統方用事
辭不就左丞張文謙宣撫河北奏為懷孟彰德大名等
路提舉學校官又辭遺執政書其畧曰先王之道不明
異端邪說害之也橫流奔放天理不絕如線今天子神

聖俊又輻輳言納計用先王之禮樂教化興明修復維其時矣若夫簿書期會文法末節漢唐猶不屑也執事者因陋就簡此焉是務良可惜哉夫善始者未必善終今不能遡流求源明法正俗育材興化以拯數百千年之禍僕恐後日之弊將有不可勝言者矣人或勉之仕則曰後世去古雖遠而先王之所設施本末先後猶可考見故為政者莫先於復古苟因習舊弊以求合乎先王之意不亦難乎吾又不能隨時俛仰以赴機會將焉

用仕於是杜門著書一不以窮通得喪動其志優游道
藝以終其身年七十遺命其子處立處愿曰吾即死當
表吾墓曰緱山杜處士天厯中贈資德大夫翰林學士
上護軍追封魏郡公諡文獻所著書曰春秋地理原委
十卷語孟旁通八卷皇極引用八卷皇極疑事四卷極
學十卷律呂律厯禮樂雜志三十卷文集十卷其於律
則究其始研其義長短清濁周徑積實各以類分取經
史之說以實之而折衷其是非其於厯則謂造厯者皆

從十一月甲子朔夜半冬至為歷元獨邵子以為天開
於子取日甲月子星甲辰子為元會運世之數無朔虛
無閏餘率以三百六十為歲而天地之盈虛百物之消
長不能出乎其中矣論閉物開物則曰開於巳閉於戊
五天之中也六地之中也戊巳月之中星也又分卦配
之紀年金之大定庚寅交小過之初六國朝之甲寅三
月二十有三日寅時交小過之九四多先儒所未發掇
其要著於篇云

張特立字文舉東明人初名永避金衛紹王諱易今名
中泰和進士為偃師主簿改宣德州司候州多金國戚
號難治特立至官俱往謁之有五將軍率家奴劫民羣
羊特立命大索閭里遂過將軍家溫言誘之曰將軍宅
寧有盜羊者邪聊視之以杜衆口潛使人索其後庭得
羊數十遂縛其奴繫獄其子匿他舍捕得之以近族得
減死論豪貴由是遵法民賴以全正大初遷洛陽令時
軍旅數起郡縣窘迫東帥赫舍哩約赫德又侮慢儒士

會移鎮陝右道經洛陽見特立淳古不禮之遽責令治
糗具期三日足後期如軍法縣民素賢特立爭論於庭
帥大奇之既而拜監察御史首言世宗諸孫不宜幽囚
尚書右丞延扎舒嚕與民爭田參知政事圖克坦烏登
諂事近習皆當罷黜執政者忌之會平章政事巴薩犒
軍陝西特立又劾其掾不法巴薩訴於哀宗言特立所
言事失實哀宗宥之遂歸田里特立通程氏易晚教授
諸生東平嚴實每加禮焉歲丙午世祖在潛邸受王印

首傳旨諭特立曰前監察御史張特立養素邱園易代
如一今年幾七十研究聖經宜錫嘉名以光潛德可特
賜號曰中庸先生又諭曰先生年老目病不能就道故
令趙寶臣諭意且名其讀書之堂曰麗澤壬子歲復降
璽書諭特立曰白首窮經誨人不倦無過不及學者宗
之昔已賜嘉名今復諭意癸丑特立卒年七十五中統
二年詔曰中庸先生學有淵源行無瑕玷雖經喪亂不
改故常未遂邱園之責俄興窳窳之悲可復賜前號以

彰寵數特立所著書有易集說歷年係事記

杜本字伯原其先居京兆後徙天台又徙臨江之清江
遂為清江人本博學善屬文江浙行省丞相呼哩木得
其所上救荒策大奇之及入為御史大夫力薦於武宗
嘗召至京師未幾歸隱武夷山中文宗在江南時聞其
名及卽位以幣徵之不起至正三年右丞相托克托以
隱士薦詔遣使賜以金織文幣上尊酒召為翰林待制
奉議大夫兼國史院編修官使者致君相意趣之行至

杭州稱疾固辭而致書於丞相曰以萬事合為一理以萬民合為一心以千載合為一日以四海合為一家則可言制禮作樂而躋五帝三王之盛矣遂不行本湛靜寡欲無疾言遠色與人交尤篤於義有貧無以養親無貲以為學者皆濟之平居書冊未嘗釋手天文地理律歷度數靡不通究尤工於篆隸所著有四經表義六書通編十原等書學者稱為清碧先生至正十年卒年七十有五時有張樞子長者婺之金華人亦屢徵不起樞

幼聰慧外家潘氏蓄書數萬卷樞盡取而讀之過目輒
不忘既長肆筆成章頃刻數千言有問以古今沿革政
治得失宇宙之分合禮樂之廢興以至帝號官名歲月
先後厯厯如指諸掌其為文務推明經史以扶翼教道
尤長於紀事嘗取三國時事撰漢本紀列傳附以魏吳
載記為續後漢書七十三卷臨川危素稱其立義精密
可備勸講朝廷取其書寘宣文閣浙東部使者交薦之
前後章九上至正三年命儒臣纂修遼金宋三史右丞

相托克托以監修國史領都總裁辟樞本府長史力辭
不拜七年申命史臣纂修本朝后妃功臣傳復以翰林
修撰儒林郎同知制誥兼國史院編修官召樞俾與討
論復避不就使者強之行至杭州固辭而歸嘗著春秋
三傳歸一義三十卷刊定三國志六十五卷林下竊議
曲江張公年譜各一卷敝帚編若干卷至正八年卒年
五十有七

孫轍字履常其先自金陵徙家臨川轍幼孤母蔡氏教

之知警策自樹立比長學行純篤事母甚孝家居教授
門庭蕭然而考德問業者日盛郡中俊彥有聲者皆出
其門輒與人言一以孝弟忠信為本辭溫氣和聞者莫
不油然而感悟待親戚鄉里禮意周洽言論間未嘗幾微
及人過失長短士子至郡者必來見部使者長吏以下
仁且賢者必造焉輒樂易莊敬接之以禮言不及官府
憲司屢辟皆不就江西行省特以遺逸舉輒一人輒善
為文章吳澂嘗敘其集曰所謂仁義之人其言藹如也

其見稱許如此元統二年年七十有三卒於家同郡吳定翁字仲谷其先當宋初自金陵來徙定翁幼歲儼如成人寒暑衣冠不少懈清修文雅與孫轍齊名而最善為詩揭傒斯稱其幽茂疎澹可比盧摯御史及江西之方伯牧守部使者辟薦相望終身不為動程鉅夫嘗貽書曰臨川士友及門者踵相接也何相望足下耿耿如玉人而不可得見乎定翁嘗曰士無求用於世惟求無媿於世人以為名言

何中字太虛撫之樂安人少穎拔以古學自任家有藏書萬卷手自校讐其學弘深該博廣平程鉅夫清河元明善柳城姚燧東平王構同郡吳澂揭傒斯皆推服之至順二年江西行省平章全約珠聘為龍興郡學師明年六月以疾卒所著有易類象二卷書傳補遺十卷通鑑綱目測海三卷知非堂藁十七卷同郡危復之字見心宋末為太學生師事湯漢博覽羣書好讀易尤工於詩至元初元帥郭昂屢薦為儒學官不就至元中朝廷

累遣奉御察罕及翰林應奉詹玉以幣徵之皆弗起隱於紫霞山中士友私謚曰貞白先生

武恪字伯威宣德府人初以神童遊學江南吳澂為江西儒學副提舉薦入國學肄業明宗在潛邸選恪為說書秀才及出鎮雲南恪在行明宗欲起兵陝西恪諫曰太子北行於國有君命於家有叔父之命今若向京師發一箭史官必書太子反左右惡恪言乃曰武秀才有母在京合遣其回恪遂還京師居陋巷教訓子弟文宗

知其名除祕書監典簿秩滿丁內艱再除中瑞司典簿
改汾西縣尹皆不起或勸之仕恪曰向為親屈今親已
死不復仕矣居數歲會朝廷選守令台哈布哈舉恪為
平陽沁水縣尹亦不赴近臣又薦為授經郎恪遂陽為
瘖瘖不就恪好讀周易每日堅坐或問之曰先生之學
以何為本恪曰以敬為本所著有水雲集若干卷其從
學者多有所成佛嘉努為太尉諤勒哲布哈僉樞密院
事皆有賢名

元史卷一百九十九

元史卷一百九十九考證

杜瑛傳中書鈕祜錄開府於相 按蘇天爵撰杜瑛行

狀云鈕祜錄開府彰德地理志彰德唐相州地據此
則原文應是開府於相作為相誤

張特立傳赫舍哩約赫德延扎舒嚕 赫舍哩約赫德

金史作紇石烈牙吾塔此作紇石烈牙兀斛延扎舒
嚕金史作顏蓋世魯此作顏蓋石魯今畫一改

巴薩訴於哀宗言特立所言事失實哀宗宥之 原本

作世宗傳上稱金世宗遂連及誤書按特立正大初為洛陽令正大金哀宗號在金世宗後三十餘年又按巴薩為平章亦在哀宗未據改

杜本傳所著有四經表義六書通編十原等書 按危素撰本墓碑有清江碧嶂集及同文正聲韻類等書又傳內附張樞列其著作凡六而名賢錄稱樞錄宋未仗節諸人名及宋季逸事傳皆未載

孫轍傳吳定翁與轍齊名最善為詩揭傒斯稱其可比

盧摯 按元史不立摯傳畿輔通志載摯涿郡人官翰林學士書史會要摯字處道元初稱能詩者以摯為首所著有疎齋集



欽定四庫全書蒼要卷六千五百七十九 史部

元史卷二百

明翰林學士亞中大夫知制誥兼修國史宋濂等修

列傳第八十七

列女

崔氏

周氏

楊氏

胡烈婦

關文興妻

郎氏

秦氏二女

焦氏

趙孝婦

霍氏二婦

王德政妻

濟魯克沁

段氏

朱虎妻

聞氏

馬英

馮氏

李君進妻

朱淑信

葛妙真

王氏

張義婦

丁氏

趙美妻

托克托鼎

趙彬妻

貴格

臺叔齡妻

李智貞

蔡三玉

古者女子之居室也必有傅姆師保為陳詩書圖史以

訓之凡左右佩服之儀內外授受之別與所以事父母
舅姑之道蓋無所不備也而又有天子之后妃諸侯之
夫人躬行於上以率化之則其居安而有淑順之稱臨
變而有貞特之操者夫豈偶然哉後世此道既廢女生
而處閨闈之中溺情愛之私耳不聆箴史之言目不覩
防範之具由是動踰禮則而往往自放於邪僻矣苟於
是時而有能以懿節自著者焉非其生質之美則亦豈
易致哉史氏之書所以必錄而弗敢畧也元受命百餘

年女婦之能以行聞於朝者多矣不能盡書采其尤卓異者具載於篇其間有不忍夫死感慨自殺以從之者雖或失於過中然較之苟生受辱與更適而不知愧者有間矣故特著之以示勸厲之義云

崔氏周珠赫妻也丁亥歲從珠赫官平陽金將來攻城克之下令官屬妻子敢匿者死時珠赫以使事在上黨崔氏急即抱幼子禎以詭計自言於將將信之使軍吏書其臂出之崔氏曰婦人臂使人執而書非禮也以金

賂吏使書之紙吏曰吾知汝誠賢婦然令不敢違令崔
自揜袖吏懸筆而書焉既出有言其詐者將怒命追之
崔與禎伏土窖三日得免既與珠赫會未幾珠赫以病
亡崔年二十九即大慟柩前誓不更嫁斥去麗飾服皂
布弊衣放散婢僕躬自紡績悉以資產遺親舊有權貴
使人諷求娶輒自爬毀其面不欲生四十年未嘗妄言
笑預吉會治家教子有法人比古烈婦云

周氏灤平石城人年十六適李伯通生一子名易金末

伯通監豐潤縣國兵攻之城破不知所終周氏與易被虜謂偕行者曰人苟愛其生萬一受辱不如死也即自投於塹主者怒拔佩刀三刃其體而去得不死遂攜易而逃間關至汴績維以自給教易讀書有成

楊氏東平須城人夫郭三從軍襄陽楊氏留事舅姑以孝聞至元六年夫死戍所母欲奪嫁之楊氏號痛自誓乃已久之夫骨還舅曰新婦少年終必他適可令吾子鰥處地下耶將求里人亡女骨合瘞之楊氏聞益悲不

食五日自經死遂與夫共葬焉

胡烈婦渤海劉平妻也至元七年平當戍棗陽車載其家以行夜宿沙河傍有虎至銜平去胡覺起追及之持虎足顧呼車中兒取刀殺虎虎死扶平還至李陽城求醫以傷卒縣官言狀命恤其母子仍旌異之至大間建德王氏女父出耘舍傍遇豹為所噬曳之升山父大呼女識父聲驚趨救以父所棄鋤擊豹腦殺之父乃得生闕文興妻王氏名醜醜建康人也文興從軍漳州為其

萬戶府知事王氏與俱行至元十七年陳弔眼作亂攻
漳州文興率兵與戰死之王氏被掠義不受辱乃給賊
曰俟吾葬夫即汝從也賊許之遂脫得負屍還積薪焚
之火既熾即自投火中死至順三年事聞贈文興侯爵
諡曰英烈王氏曰貞烈夫人有司為立廟祀之號雙節
云

郎氏湖州安吉人宋進士朱甲妻也朱嘗仕浙東以郎
氏從至元間朱歿郎氏護喪還至玉山里留居避盜勢

家柳氏欲強聘之郎誓不從夜棄裝奉柩遁柳邀之中
道復死拒得免家居養姑甚謹姑嘗病郎禱天刲股肉
進啖而愈後姑喪以哀聞大德十一年旌美之又有東
平鄭氏大寧杜氏安西楊氏竝少寡守志割體肉療姑
病

秦氏二女河南宜陽人逸其名父嘗有危疾醫云不可
攻姊閉戶默禱鑿己腦和藥進飲遂愈父後復病欲絕
妹刲股肉置粥中父小啜即甦孫氏女河間人父病癩

十年女禱於天求以身代且吮其膿血旬月而愈許氏
女安豐人父疾割股啖之乃痊張氏女廬州人嫁為高
皇妻母病目喪明張氏歸省抱母泣以舌舐之目忽能
視州縣各以狀聞褒表之

焦氏涇陽素天祐妻也天祐祖父始皆從軍歿祖母楊
氏母焦氏竝家居守志至元二十三年天祐復從征死
甘州妻焦氏年少宗族欲改嫁之焦氏哭且言曰素氏
不幸三世早寡自祖姑以來皆守節義豈可至吾而遂

廢乎吾生為袁氏婦死則葬袁氏土爾終不能改容事他人也衆不敢復言周氏澤州人嫁為安西張興祖妻年二十四興祖歿舅姑欲使再適周氏弗從曰妾家祖父皆早世妾祖母妾母並以貞操聞妾或中道易節是忘故夫而辱先人也夫忘故夫不義辱先人不孝不孝不義妾不為也遂居嫠三十年奉舅姑生事死葬無違禮其父與外祖皆無後葬祭之禮亦周氏主之有司以聞竝賜旌異

趙孝婦德安應城人早寡事姑孝家貧傭織於人得美食必持歸奉姑自啖麤糲不厭嘗念姑老一旦有不諱無由得棺乃以次子鬻富家得錢百緡買杉木治之棺成置於家南隣失火時南風烈甚火勢及孝婦家孝婦亟扶姑出避而棺重不可移乃撫膺大哭曰吾為姑賣兒得棺無能為我救之者苦莫大焉言畢風轉而北孝婦家得不焚人以為孝感所致

霍氏二婦尹氏楊氏夫家鄭州人至元間尹氏夫耀卿

歿姑命其更嫁尹氏曰婦之行一節而已再嫁而失節

妾不忍為也姑曰世之婦皆然人未嘗以為非汝獨何

恥之有尹氏曰人之志不同妾知守妾志爾姑不能強

楊氏夫顯卿繼歿慮姑欲其嫁即先白姑曰妾聞姊如

猶兄弟也宜相好焉今如既留妾可獨去乎願與共修

婦道以終事吾姑姑曰汝果能若是吾何言哉於是同

處二十餘年以節孝聞又有邠州任氏乾州田氏皆一

家三婦俱少寡誓不他適戮力蠶桑以養舅姑事聞竝

命褒表

王德政妻郭氏大名人少孤事母張氏孝謹以女儀聞於鄉及笄富貴家慕之爭求聘張氏不許時德政教授里中年四十餘貌甚古陋張氏以貧不能教二子欲納德政為壻使教之宗族皆不然郭氏慨然願順母志既婚與德政相敬如賓屬教二弟有成未幾德政卒郭氏年方二十餘勵節自守甚有貞名大德間表其家

濟魯克沁蒙古氏年二十六夫呼圖克病卒誓不再醮

孝養舅姑逾十五年舅姑歿塵衣垢面廬於墓終身至元間旌之其後又有翼城宋仲榮妻梁氏舅歿負土為墳懷孟何氏大名趙氏竝以夫歿守志養舅姑以壽終親負土築其墳高三丈餘

段氏隆興霍榮妻也榮無子嘗乞人為養子榮卒段氏年二十六養舅姑以孝稱舅姑歿榮諸父仲汶貪其產謂段曰汝子假子也可令歸宗汝無子宜改適霍氏業汝無預焉段曰家資不可計但再醮非義尚容妾思之

即退入寢室引針刺面墨漬之誓死不貳大德二年府上狀中書給羊酒幣帛仍命旌門復役如制又有興和吳氏自刺其面成紀謝思明妻趙氏自髡其髮冀寧田濟川妻武氏溧水曹子英妻尤氏嚙指滴血竝誓不更嫁各以有司為請旌之

朱虎妻茅氏崇明人大德間虎官都水監坐罪籍其家吏錄送茅氏及二子赴京師太醫提點師甲乞歸家欲妻之茅氏誓死不從母子三人以裾相結連晝夜倚抱

號哭形貌銷毀師知不可奪釋之茅氏託居永明尼寺
憂憤不食卒

聞氏紹興俞新之妻也大德四年新之歿聞氏年尚少
父母慮其不能守欲更嫁之聞氏哭曰一身二夫烈婦
所恥妾可無生可無恥乎且姑老子幼妾去當令誰視
也即斷髮自誓父知其志篤乃不忍強姑久病風且失
明聞氏手滌溷穢不怠時漱口上堂舐其目目為復明
及姑卒家貧無資傭工與子親負土葬之朝夕悲號聞

者慘惻鄉里嘉其孝為之語曰欲學孝婦當問俞母又有劉氏渤海李五妻也少寡父母使再醮不從舅患疽劉禱於天數日潰吮其血乃愈既而親挽小車載舅詣岳祠以答神貺

馬英河內人性孝友父喪哀毀二兄繼歿英獨事母甚謹又奉二寡嫂與居使得保全嫠節及喪母卜地葬諸喪親負土為四墳手植松柏廬墓側終身趙氏女名玉兒冠州人嘗許為李氏婦未婚夫死遂誓不嫁以養父

母父母歿負土為墳鄉里稱孝焉

馮氏名淑安字靜君大名宦家女山陰縣尹山東李如忠繼室也如忠初娶蒙古氏生子任數歲而卒大德五年如忠病篤謂馮曰吾已矣其奈汝何馮氏引刀斷髮自誓不他適如忠歿兩月遺腹生一子名伏李氏及蒙古氏之族在北聞如忠歿於官家多遺財相率來山陰馮氏方病乘間盡取其貲及子任以去馮不與較一室蕭然唯餘如忠及蒙古氏之柩而已朝夕哭泣隣里不

忍聞久之鬻衣權厝二柩戢山下攜其子廬墓側時年
始二十二羸形苦節為女師以自給父母來視之憐其
孤苦欲使更事人馮爪面流血不肯從居二十年始護
喪歸葬汶上齊魯之人聞之莫不嘆息

李君進妻王氏遼陽人大德八年君進病卒卜葬將發
引親戚隣里咸會王氏謂衆曰夫婦死同穴義也吾得
從良人逝不亦可乎因撫棺大慟嘔血升許即仆於地
死衆為斂之與夫柩竝葬送者數百人莫不洒泣伊喇

氏同知湖州路事耶律呼圖克布哈妻也夫歿割耳自
誓既葬廬墓側悲號不食死趙氏名哇兒大寧人年二
十夫蕭氏病劇謂哇兒曰我死汝年少若之何哇兒曰
君幸自寬脫有不可諱妾不獨生必從君地下遂命匠
制巨棺夫歿即自經死家人同棺斂葬焉又有雷州朱
克彬妻周氏大都費巖妻王氏邁格妻耶律氏曹州鄭
臘兒妻康氏陝州陳某妻別娥娥大同宋堅童妻班氏
李安童妻胡氏晉州劉恕妻趙氏冀寧王思忠妻張氏

饒州劉楫妻趙氏東平徐順妻彭氏大寧趙肫兒妻安
氏陳恭妻張氏武壽妻劉氏宋敬先妻謝氏薩里妻蕭
氏古城魏貴妻周氏任城郭灰兒妻趙氏棗陽朱某妻
丁氏葉縣王保子妻趙氏興州某氏妻魏氏灤州裴某
妻董貴哥成都張保童妻郝氏利州高托卜嘉妻白氏
河南楊某妻盧氏蒙古氏泰珠妻額卜齊桑烏遜妻托
克托沁竝早寡不忍獨生以死從夫者事聞悉命褒表
或賜錢贈諡云

朱淑信山陰人少寡誓不再嫁一女妙淨幼哭父雙目
竝失明及長擇偶者不至家貧歲凶母子相依以苦節
自厲士人王士貴重其孝乃求娶焉

葛妙真宣城民家女九歲聞日者言母年五十當死妙
真即悲憂祝天誓不嫁終身齋素以延母年母後年八
十一卒輝和爾氏三女家錢塘諸兄遠仕不歸母思之
疾三女欲慰母意共斷髮誓天終身不嫁以養母同力
侍護四十餘年母竟以壽終事上竝賜旌異

王氏燕人張邁努妻也年十六邁努官錢塘病歿葬城西十里外王氏每旦被髮步往奠之伏墓大慟欲絕久而致疾舅姑力止其行乃已服闋舅姑謂之曰吾子已歿新婦年尚少宜自圖終身計毋徒淹吾家也王氏泣曰父母命妾奉箕帚於張氏今夫不幸早逝天也此足豈可復履他人門乎固不從筑居三十年貞白無少玷又有馮翊王義妻盧氏睢陽劉澤妻解氏東平楊三妻張氏並守志有節命旌其門

張義婦濟南鄒平人年十八歸里人李伍伍與從子零
戍福寧未幾死戍所張獨家居養舅姑甚至父母舅姑
病凡四割股肉救不懈及死喪葬無遺禮既而歎曰妾
夫死數千里外妾不能歸骨以葬者以舅姑父母在無
所仰故也今不幸父母舅姑已死而夫骨終暴棄遠土
使無妾即已妾在敢愛死乎乃臥積冰上誓曰天若許
妾取夫骨雖寒甚當得不死踰月竟不死鄉人異之乃
相率贈以錢大書其事於衣以行行四十日至福寧見

零問夫葬地則榛莽四塞不可識張哀慟欲絕夫忽降於童言動無異其生時告張死時事甚悲且指示骨所在處張如其言發得之持骨祝曰爾信妾夫耶入口當如冰雪黏如膠已而果然官義之上於大府使零護喪還給錢使葬仍旌門復其役

丁氏新建鄭伯文妻也大德間伯文病將歿丁氏與訣曰妾自得侍巾櫛誓與偕老君今不幸疾若是脫有不諱妾當從但君父母已老無他子婦侍養妾苟復自亡

使君父母食不甘味則君亦不瞑目矣妾且忍死以奉其餘年必不改事他人以負君於冥冥也伯文卒丁氏年二十七居喪哀毀服既除父母屢議奪嫁之丁氏每聞必慟哭曰妾所以不死者非苟生有他志也與良人約將以事舅姑耳今舅姑在堂固無恙妾可棄去而不信於良人乎父遂止舅姑嘗病丁氏夙夜護視衣不解帶及死喪葬盡禮事上表其門白氏太原人夫慕釋氏道棄家為僧白氏年二十留養姑不去服勤績紵以供

租賦夫一日還迫使他適白斷髮誓不從夫不能奪乃去姑年九十卒竭力營葬畫姑像祀之終身

趙美妻王氏內黃人至治元年美溺水死王氏誓守志舅姑念其年少無子欲使更適人王氏曰婦義無再醮且舅姑在妾可棄而去耶舅姑乃欲以族姪與繼婚王氏拒不從舅姑迫之力王氏知不免即引繩自經死李冬兒甄城人丁從信妻也年二十三從信歿服闋父母呼婦問之曰汝年少居孀又無子何以自立吾為汝再

擇婿何如冬兒不從詣從信家哭欲縊墓樹上家人防
之不果日暮還從信家夜二鼓入室更新衣自經死李
氏濱州惠高兒妻也年二十六高兒歿父欲奪歸嫁之
李氏不從自縊而死

托克托鼎昂吉爾氏有色善女工年二十六夫哈喇布
哈卒前妻有二子皆壯無婦欲以俗制收繼之托克托
鼎以死自誓二子百計求遂托克托鼎恚罵曰汝禽獸
行欲妻母耶若死何面目見汝父地下二子慙懼謝罪

乃析業而居三十年以貞操聞王氏成都李世安妻也
年十九世安卒夫弟世顯欲收繼之王氏不從引刃斷
髮復自割其耳創甚親戚驚歎為醫療百日乃愈狀上
並旌之

趙彬妻朱氏名錦哥洛陽人也天曆初西兵掠河南朱
氏遇兵五人被執逼與亂朱氏拒曰我良家婦豈從汝
賊耶兵怒提曳箠楚之朱氏度不能脫即紿謂之曰汝
幸釋我舍後井傍有瘞金當發以遺汝兵信之乃隨其

行朱氏得近井即抱三歲女躡身赴井中死是歲又有
偃師王氏女名安哥從父避兵印山丁家洞兵入搜得
之見安哥色美驅使出欲污之安哥不從投澗死有司
言狀並表其廬

貴格蒙古氏同知宣政院事羅五十三妻也天曆初五
十三得罪貶海南籍其家詔以貴格賜近侍茂罕茂罕
親率車騎至其家迎之貴格度不能免令婢僕以飲食
延茂罕於廳事如廢自經死

臺叔齡妻劉氏順寧人也粗知書克修婦道一日地震屋壞壓叔齡不能起家復失火叔齡母前救不得欲就焚叔齡望見呼曰吾已不可得出當亟救吾母劉謂夫妹曰汝救汝母汝兄必死吾不用復生矣即自投火中死火滅家人得二屍燼中猶手相握不開官嘉其烈上於朝命錄付史臣

李智貞建寧浦城人父子明無子智貞七歲能讀書九歲母病調護甚謹及卒哀慟欲絕不茹葷三年治女工

供祭祀及奉父甘旨不乏鄉里稱為孝女父嘗許為鄭
全妻未嫁從父客邵武邵武豪陳良悅其慧強納采求
聘智貞斷髮拒之且數自求死良不能奪卒歸全事舅
姑父母皆有道泰定間全病歿智貞悲泣不食數日而
死

蔡三玉龍溪陳端才妻也盜起漳州掠龍溪父廣瑞與
端才各竄去三玉獨偕夫妹出避隣祠中盜入斫夫妹
見三玉美不忍傷與里婦歐氏同驅納舟中行至柳營

江迫妻之三玉佯許諾因起更衣自投江水而死越三日屍流至廣瑞舟側廣瑞識為女收斂之歐氏脫歸言狀有司高其操為請表之乃命旌門復役仍給錢以葬

元史卷二百

元史卷二百考證

闕文興妻王氏傳至順三年贈文興侯爵諡曰英烈

按順帝紀元統二年五月贈文興英毅侯與傳互異
霍氏傳乾州田氏一家夫婦俱少寡誓不他適 按續

通考田大妻郝氏田二妻胥氏田三妻周氏

李君進妻王氏 君進續通考作君用傳內趙氏哇兒
夫蕭氏續通考作趙哇兒妻蕭氏

欽定四庫全書薈要卷六千五百八十史部

元史卷二百一

明翰林學士亞中大夫知制誥兼修國史宋濂等修

列傳第八十八

列女

武用妻蘇氏真定人徙家京師用疾蘇氏刲股為粥以
進疾即愈生子德政四歲而寡夫之兄利其資欲逼而
嫁之不聽未幾夫兄舉家死惟餘三弱孫蘇氏取而育

之德政長事蘇氏至孝蘇氏死時天大旱德政方掘地求水以供葬事忽二蛇躍出德政因默禱焉二蛇一東一北隨其地掘之果得泉有司上其事旌復其家

任仲文妻林氏寧海人家甚貧年二十八而寡姑患風疾不良於行林氏旦暮扶持惟謹撫育三子皆有成年一百三歲而卒

江文鑄妻范氏名妙元奉化人年二十一歸於江及門未合卺夫忽以癩疾卒范曰我既入江氏之門即江氏

婦也豈以夫亡有異志哉遂居江氏之家撫諸姪江森
江道如己子卒年九十五有柳氏者薊郡人為戶部主
事趙野妻未成婚而野卒柳哭之盡哀誓不再嫁其兄
將奪其志柳曰業已歸趙氏雖未成婚而夫婦之禮已
定矣雖凍餓死豈有他志哉後寢疾不肯服藥曰我年
二十六而寡今已逾半百得死此疾幸矣遂卒

姚氏餘杭人居山谷間夫出刈麥姚居家執爨母何氏
往汲澗水久而不至俄聞覆水聲亟出視則虎銜其母

以走姚倉卒往逐之即以手毆其脇隣人競執器械以從虎乃置之而去姚負母以歸求藥療之奉養二十餘年而卒又方寧妻官勝娘者建寧人寧耨田勝娘饑之見一虎方攫其夫勝娘即棄饑奮梃連擊之虎舍去勝娘負夫至中途而死有司以聞為旌復其家

衣氏汴梁儒士孟志剛妻志剛卒貧而無子有司給以棺木衣氏給匠者曰可寬大其棺吾夫有遺衣服欲盡置其中匠者然之是夕衣氏具雞黍祭其夫家之所有

悉散之隣里及同居王媪曰吾聞一馬不被兩鞍吾夫
既死與之同棺共穴可也遂自剄死有侯氏者鈞州曹
德妻德病死侯氏語人曰年少夫亡婦人之不幸也欲
守吾志而亂離如此其能免乎遂縊死於墓又周經妻
吳氏郭惟辛妻郝氏陳輝妻白氏張碩住妻杜氏程二
妻成氏李貞妻武氏溫都爾妻張氏並以夫亡不忍獨
生自縊而死事聞咸旌異之

湯煇妻張氏處州龍泉人會兵亂其家財先已移入山

此若夫與姑共守之舅以疾未行張歸任藥膳且以輿自隨既而賊至即命以輿載其舅而已遇賊賊以刀脅之曰從我則生否則死張掠髮整衣請受刃賊未忍殺張懼污即奪其刃自割死年二十七又湯姁者亦龍泉人有姿容賊殺其父母以刃脅之姁不勝悲咽乞早死因以頭觸刃賊怒斫殺之其妹亦不受辱而死

俞士淵妻童氏嚴州人姑性嚴待之寡恩童氏柔順以事之無少拂其意者至正十三年賊陷威平官軍復之

已乃縱兵剽掠至士淵家童氏以身蔽姑衆欲污之童氏大罵不屈一卒以刀擊其左臂愈不屈又一卒斷其右臂罵猶不絕衆乃皮其面而去明日乃死

張氏女高郵人城亂賊知張女有姿豔叩其家索之女方匿複宇間賊將害其父母女不得已乃出拜賊賊即伏地呼其父母為丈人媪而以女行女欣然從之過橋投水死有高氏婦者同郡人也攜其女從夫出避亂見道旁空舍入其中脫金纏臂與女且語夫令疾行夫

挈女稍遠乃解足紗自經賊至焚其舍夫抵儀真夜夢婦來告曰我已縊死彼舍矣其精爽如此

惠士玄妻王氏大都人至正十四年士玄病革王氏曰吾聞病者糞苦則愈乃嘗其糞頗甘王氏色愈憂士玄囑王氏曰我病必不起前妾所生子汝善保護之待此子稍長即從汝自嫁矣王氏泣曰君何為出此言耶設有不諱妾義當死尚復有他說乎君幸有兄嫂此兒必不失所居數日士玄卒比葬王氏遂居墓側蓬首垢面

哀毀逾禮常以妻子置左右飲食寒暖惟恐不至歲餘
妻子亦死乃哭曰無復望矣屢引刀自殺家人驚救得
免至終喪親舊皆攜酒醴祭士玄於墓祭畢衆欲行酒
王氏已經死於樹矣又有王氏者良鄉費隱妻也隱有
疾王氏數嘗其糞及疾篤囑王氏曰我一子一女雖妾
所生無異汝出之也我死汝其善撫育之遂歿王氏居
喪撫其子女既而子又死服除謂其親屬曰妾聞夫乃
婦之天今夫已死妾生何為乃執女手語之曰汝今已

長稍知人事管鑰在此汝自司之遂相抱慟哭是夜縊死於園中

李景文妻徐氏名彩鸞字淑和浦城徐嗣源之女畧通經史每誦文天祥六歌必為之感泣至正十五年青田賊寇浦城徐氏從嗣源逃旁近山谷賊持刀欲害嗣源徐氏前曰此吾父也寧殺我賊舍父而止徐氏徐氏語父曰兒義不受辱今必死父可速去賊拘徐氏至桂林橋拾炭題詩壁間有惟有桂林橋下水千年照見妾心

清之句乃厲聲罵賊投於水賊競出之既而乘間復投
水死

周婦毛氏松陽人美姿色至正十五年隨其夫避亂麻
鷺山中為賊所得脅之曰從我多與若金否則殺汝毛
氏曰寧剖我心不願汝金賊以刀磨其身毛氏因大詈
曰碎骨賊汝碎則臭我碎則香賊怒剗其腸而去年二
十九

丁尚賢妻李氏汴梁人年二十餘有姿容至正十五年

賊至欲虜之李氏怒曰吾家六世義門豈能從賊以辱身乎於是闔門三百餘口俱被害

李順兒者許州儒士李讓之女也性聰慧頗涉經傳年十八未嫁至正十五年賊陷鈞州密邇許昌父謂其母曰吾家以詩禮相傳此女必累我女聞之泣曰父母可自逃難勿以我為憂須臾於後園內自經而死

吳守正妻禹氏名淑靖字素清紹興人至元十六年徙家崇德之石門淑靖嘗從容謂守正曰方今羣盜蜂起

萬一不測妾惟有死而已不使人污此身也是年夏盜陷崇德淑靖倉皇攜八歲女登舟以避有盜數輩奔入其舟將犯淑靖淑靖乃抱幼女投河死

黃仲起妻朱氏杭州人至正十六年張士誠寇杭州其女臨安奴倉皇言曰賊至矣我別母求一死也俄而賊驅諸婦至其家且指朱氏母子曰爲我看守日暮我當至也朱氏聞之懼受辱遂與女俱縊死妾馮氏見其母子已死嘆曰我生何為徒受辱耳亦自縊死繼而仲起

弟妻蔡氏抱幼子玄童與乳母湯氏皆自縊及暮賊至見諸屍滿室執仲起將殺之哀求得脫賊遂盡掠其家財而去

焦士廉妻王氏博興人養姑至孝至正十七年毛貴作亂官軍競出虜掠王氏被執紿曰我家墓田有藏金可共取也信之隨王氏至墓所王氏哭曰我已得死所矣實無藏金汝可於此殺我乃與妾杜氏皆遇害又有趙氏者平陽人年二十未嫁寇亂趙被驅迫以行度不能

免給賊曰吾取所藏金以遺汝賊信之遂還投於廁而死

陳淑真富州陳璧之女璧故儒者避亂移家龍興淑真七歲能誦詩鼓琴至正十八年陳友諒寇龍興淑真見隣姬倉皇來告乃取琴坐牖下彈之曲終泣然流涕曰吾絕絃於斯乎父母怪問之淑真曰城陷必遭辱不如早死明日賊至其居臨東湖遂溺焉水淺不死賊抽矢脅之上岸淑真不從賊射殺之時同郡李宗頤妻夏氏

名婉常亦儒家女與女匿居後圃中賊至挾其女共投井死

秦閨夫妻柴氏晉寧人閨夫前妻遺一子尚幼柴氏鞠如己出未幾柴氏有子閨夫病且死囑柴氏曰我病不復起家貧惟二幼子女能撫其成立我死亦無憾矣閨夫死家事日微柴氏辛勤紡績遣二子就學至正十八年賊犯晉寧其長子為賊驅迫在園中既而得脫初在賊時有惡少與張福為仇往滅其家及官軍至福訴其

事事連柴氏長子法當誅柴氏引次子詣官泣訴曰往
從惡者吾次子非吾長子也次子曰我之罪可加於兄
乎鞠之至死不易其言官反疑次子非柴氏所出訊之
他囚始得其情官義柴氏之行為之言曰婦執義不忘
其夫之命子趨死而能成母之志此天理人情之至也
遂釋免其長子而次子亦得不死時人皆以為難二十
四年有司上其事旌其門而復其家
額森呼圖克蒙古欽察氏大寧路達嚕噶齊特穆爾布

哈之妻封雲中郡君夫坐事免官居大寧至正十八年紅巾賊至額森呼圖克與妾玉蓮走尼寺中為賊所得令與眾婦縫衣拒不肯為賊嚇以刃額森呼圖克罵曰我達嚕噶齊妻也汝曹賊也我不能為針工以從賊賊怒殺之玉蓮自縊者凡三賊併殺之先是其子諤勒哲特穆爾年十四與父出城見執於賊諤勒哲拜哭請代父死賊愛諤勒哲姿秀遂挈以從久之乃獲脫歸訪母屍并玉蓮葬焉

呂彥能妻劉氏陵州人至正十八年賊犯陵州彥能與家人謀所往其姊久嫠居寓彥能家先曰我喪夫二十年又無後不死何為苟辱身則辱吾弟矣赴井死劉氏語彥能曰妾為君家婦二十八年茲不幸逢亂離必不負君君可自往妾入井矣彥能二女及子婦王氏二孫女皆隨劉氏溺井一門死者七人

劉公翼妻蕭氏濟南人有姿色頗通書史至正十八年聞毛貴兵將壓境豫與夫謀曰妾詩書家女誓以冰雪

自將儻城陷被執悔將何追妾以二子一女累君去作
清白鬼於泉下耳夫曰事未至何急於此居亡何城陷
蕭解條自縊死

袁氏孤女建康路溧水州人年十五其母嚴氏孀居極
貧病癱瘓臥於牀者數年女事母至孝至正十二年兵
火延其里隣婦強攜女出避火女泣曰我何忍舍母去
乎同死而已遂入室抱母共焚而死

徐允讓妻潘氏名妙圓山陰人至正十九年與其夫從

舅避兵山谷間舅被執夫泣以救舅脫夫被兵所殺欲
強辱潘氏潘氏因給之曰我夫既死我從汝必矣若能
焚吾夫可無憾也兵信之聚薪以焚其夫火既熾潘氏
且泣且語遂投火以死又諸暨蔡氏者王琪妻也至正
二十二年張士誠陷諸暨蔡氏避之長寧鄉山中兵猝
至有造紙鑊方沸遂投其中而死

趙洙妻許氏集賢大學士有壬之姪女也至正十九年
紅巾賊陷遼陽洙時為儒學提舉夫婦避亂匿資善寺

誅以叱賊見害許氏不知也賊甘言誘許氏令指示金銀之處許氏大言曰吾詩書冠冕故家不幸遇難但知守節而死他皆不知也賊以刃脅之許氏色不變已而知其夫死因慟哭仆地罵聲不絕口且曰吾母居武昌死於賊吾女兄弟亦死賊今吾夫又死焉使我得報汝當醢汝矣遂遇害寺僧見許氏死狀哀其貞烈賊退與誅合葬之

張正蒙妻韓氏紹興人正蒙嘗為湖州德清稅務提領

至正十九年紹興兵變正蒙謂韓氏曰吾為元朝臣子
於義當死韓氏曰爾果能死於忠吾必能死於節遂俱
縊死其女池奴年十七泣曰父母既亡吾何以獨生亦
投崖而死又何氏者處之龍泉縣李銳妻也因避兵於
邑之繩門巖賊至何氏被執欲污之乃與子榮兒女回
娘投崖而死

劉氏二女長曰貞年十九次曰孫年十七龍興人皆未
許嫁陳友諒寇龍興其母泣謂二女曰城或破置汝何

所二女曰寧死不辱父母也城陷二女登樓相繼自縊
婢鄭奴亦自縊

于同祖妻曹氏茶陵人父德夫教授湖湘間同祖在諸
生中因以女妻焉至正二十年茶陵陷曹氏聞婦女多
被驅逐謂其夫及子曰是尚可全生乎我義不辱身以
累汝也顧舅年老汝等善事之遂自剄死妾李氏驚抱
持之不得亦引刀自剄絕而復蘇曰得從小君地下足
矣是夕死

李仲義妻劉氏名翠哥房山人至正二十年縣大饑平
章劉哈喇布哈兵乏食執仲義欲烹之仲義弟馬兒走
報劉氏劉氏遽往救之涕泣伏地告於兵曰所執者是
吾夫也乞矜憐之貸其生吾家有醬一甕米一斗五升
窖於地中可掘取之以代吾夫兵不從劉氏曰吾夫瘦
小不可食吾聞婦人肥黑者味美吾肥且黑願就烹以
代夫死兵遂釋其夫而烹劉氏聞者莫不哀之

李弘益妻申氏冀寧人至正二十年賊陷冀寧申語弘

益曰君當速去勿以我婦人相累若賊入吾室必以妾
故害及君矣言訖投井死弘益既免於難再娶安氏居
二歲而弘益以疾卒安氏時年三十泣謂諸親曰女子
一適人終身不改不幸夫死雖生亦何益哉乃竊入寢
室膏沐薰裳自縊於柩側

鄭琪妻羅氏名妙安信州弋陽人幼聰慧能暗誦列女
傳年二十歸琪琪家世宦族同居百餘口羅氏執婦道
無間言琪以軍功擢鉛山州判官羅氏封宜人至正二

十年信州陷羅氏度弋陽去州不遠必不免於難輒取所佩刀淬礪令銘甚琪問何為對曰時事如此萬一遇難為自全計耳已而兵至羅氏自刎死時年二十九

周如砥女年十九未適人至正二十年鄉民作亂如砥與女避於邑西之客僧嶺女為賊所執賊曰吾未娶當以汝為妻女曰我周典史女也死即死豈能從汝耶賊遂殺之如砥時為紹興新昌典史

狄恒妻徐氏天台人恒早歿徐氏守節不再醮至正二

十年鄉民為亂避難於牛國山為賊所執驅迫以前徐
給之曰吾渴甚欲求水一杯賊令自汲即投井而死時
年十八

柯節婦陳氏者長樂石梁人至正二十一年海賊劫石
梁其夫適在縣郭陳氏出避賊道與賊遇被執以行陳
氏且行且罵賊亂捶之挾以登舟罵不已忽振厲自投
江中其父方臥病見其女至呼之不應該曰吾豈夢耶
既而有自賊中歸者言陳氏死狀乃知其鬼也明日屍

逆流而上止石梁岸傍時盛暑屍已變其夫驗其背有黑子乃慟哭曰是吾妻也舁歸斂之

李馬兒妻袁氏瑞州人至正二十二年李病歿袁氏年十九誓不再嫁以養舅姑有王成者聞袁氏有姿色挾勢欲娶之袁氏曰吾聞烈女不更二夫寧死不失身也遂往夫墓痛哭縊死樹下

王士明妻李氏名賽兒房山人至正二十五年珠展軍至縣李氏及其女李家奴皆被執士明隨至軍軍怒逐

之李氏謂其女曰汝父既為軍所逐吾與汝必不得脫
與其受辱不若死女曰母先殺我李氏即以軍所遺鏹
刀殺其女遂自殺珠展聞之為之葬祭仍書其門曰王
士明妻李氏貞節之門有司上其事為樹碑焉

陶宗媛台州人儒士杜思絢妻也歸杜四載而夫亡矢
志守節台州被兵宗媛方居姑喪忍死護柩為游軍所
執迫脅之媛曰我若畏死豈留此耶任汝殺我以從姑
於地下爾遂遇害其妹宗婉弟妻王淑亦皆赴水死

高麗氏宣慰副使博囉特穆爾妻也至正二十七年十月二月其夫死於兵謂人曰夫既死矣吾安能復事人乎乃積薪塞戶以火自焚而死

張訥妻劉氏藍田人訥為監察御史早卒劉守志不二河東受兵劉氏二子衡衍俱以事出外度不能自脫遂與二婦孫氏姚氏決死盡發背囊分給家人婦姑同縊焉有華氏者大同張思孝妻為摩該兵所執以不受辱見殺其婦劉氏僵壓姑屍大罵不已兵併殺之後家人

殮其屍婦姑之手猶相持不捨

觀音努妻布延德濟蒙古氏宗王赫魯之女大都被兵
布延德濟謂其夫曰我乃國族且年少必不容於人豈
惜一死以辱家國乎遂自縊而死時張棟妻王氏語家
人曰吾為狀元妻義不可辱赴井死其姑哭之慟亦赴
井死

安志道妻劉氏順州人志道及劉氏之弟明理並登進
士第劉氏避兵匿巖穴中軍至欲污之劉氏曰我弟與

夫皆進士也我豈受汝辱乎軍士以兵磨其體劉大罵不輟聲軍怒乃鉤斷其舌含糊而死

宋謙妻趙氏大都人兵破大都趙氏子婦溫氏高氏孫婦高氏徐氏皆有姿色合謀曰兵且至矣我等豈可辱身以苟全哉趙即自經死諸婦四人諸孫男女六人衆妾三人皆赴井而死

齊關妻劉氏河南人關應募為千夫長戰死澤潞間劉氏貧無所依守志不奪有來強議婚者劉氏給曰吾三

月三日有心願償畢當從汝所言是日徑往彰德天寧寺登浮圖絕頂祝天曰妾本河南名家劉氏女遭世亂適湖南齊闕為妻今夫已死不敢失節也遂投地而死王宗仁妻宋氏進士宋聚之女也宗仁家永平永平受兵宋氏從夫避於鐸子山夫婦為軍所虜行至玉田縣有窺宋氏色美欲害宗仁者宋氏顧謂夫曰我不幸至此必不以身累君言訖遂攜一女投井死時年二十九王履謙妻齊氏太原人治家嚴肅克守婦道至正十八

年賊陷太原齊氏與二婦蕭氏呂氏及二女避難於趙莊石巖賊且至度不能免顧謂二女曰汝家五世同居號為清白豈可虧節辱身以苟生哉長女曰吾夫已死今為未亡人得死為幸呂氏曰吾為中書左丞之孫義不受辱齊氏大哭乃與二婦二女及二孫女俱投巖下以死

王時妻安氏名正同磁州人平章政事祐孫女也至正十九年時以參知政事分省太原安氏從之二十年賊

兵寇太原城陷衆皆逃安氏與其妾李氏同赴井死事
聞贈梁國夫人謚莊潔

徐獠頭妻岳氏大都人兵入都城岳氏告其夫曰我等
恐被驅逐將奈何其夫曰事急惟有死耳何避也遂火
其所居夫婦赴火以死其母王氏二女一子皆抱持赴
火死

金氏詳定使四明程徐妻也京城既破謂其女曰汝父
出捍城我三品命婦汝儒家女又進士妻不可受辱抱

二歲子及女赴井死

汪琰妻潘氏徽州婺源人年二十八而琰卒潘氏誓不
他適以其夫從兄之子元圭為後元圭時始三歲鞠之
不啻己出潘氏卒年六十二元圭之子良楹有子燕山
燕山卒時妻李氏年二十四無子乃守志自誓父母欲
奪而嫁之不聽燕山兄子惟德娶俞氏惟德早死二子
甚幼俞氏守節辛勤不墜家業故人賢汪氏之門而稱
曰三節同郡歙縣吳子恭之妻蔣氏年二十八而夫亡

孀居五十年年七十八卒至正十四年旌表門閭

元史卷二百一

元史卷二百一考證

俞士淵 浙江通志作俞溥

吳守正妻禹氏傳至正十六年徙家崇德之石門 至
正訛至元按順帝至元六年即改元至正傳中羣盜
蜂起云云合是至元年間事今改

王時妻安氏傳至正十九年時以參知政事分省太原
按宰相表時除參政在至正十九年分省太原在

二十年





總校官編修臣吳紹深